

E hia huru manaò

Te vāhi ta teie uiraa e tītau mai nei ia tātou, te iteraa ia e, e manaò taa ē ānei to te Papaā i to te Māōhi, to terā nūnaa i to terā nūnaa, e mai te peu hoi e, te vai ra te reira taa-ē-raa, e aha ia te mea e faataa ē ra i te tahi e te tahi.

Te fifi o tele huru uiraa, o te riro ia ei taima faaiteraa na tātou i to tātou au òre i terā e terā nūnaa, tano atu ai tātou i te mau hiōraa ta tātou e rave mai ei faatanoraa ia tātou iho.

Ia hiōhia te taata, te vai nei te uōuō, te ēreēre, te ūteūte, te reā reā, e te mau ānoinoiraa atoā ua rau te huru. Ia rave hoi tātou i te pupu tātai tahi, ua rau atoā ia te reo e faataa ē ra i te mau taata i roto i te reira pupu e te reira pupu, e òre ai te tahi e taa i to te tahi reo.

Ia rave hoi tātou i te peu, tahi atoā ia mea e faataa ē nei i te tahi pupu taata i te tahi. E tano tātou e faarahi noa atuā i te hiōraa, e hoi noa mai ihoā ra te uiraa e, mea taa ē ānei to te tahi manaò i to te tahi.

Hou tātou a tāmata ai i te pāhono i teie uiraa, e mata na tātou i te hiō maitai i te huru faanahoraahia ta tātou uiraa. E rave tātou i te upoo parau : E hia huru manaò, aore ra te vāhi e vai ra i te ōmuaraa : E manaò taa ē ānei to te Papaā i to te Māōhi, e ite tātou e, aita e taata i faaērehia i te manaò, e e faufaa te reira na te taata atoā. I roto i te parau o te taa-ē-raa, te vāhi ta te taò e heheu mai ra, te ātearaa ia (ē) te tahi manaò i to te tahi ; e ia faahiti hoi tātou i te parau o te taa ra, no te faaite ia e, te vai ra te tahi mauraa, te tahi tāmuraa i te haamataraa, mai reira te tupuraa te ātearaa e parauhia nei. Ua ite maitai hoi tātou e, aita to te taa e parau, mai te peu aita e manaò no te hoēraa.

Hiō na tātou i te huru o te taata i roto

i te hoē rururaa ia faaterehia te tahi haapiiraa. Ia tae i te taima, te anihia atu ra : Aita to òutou e manaò ? Te tiā mai ra te tahi no te parau e : E manaò teie ; e ia anihia atu hoi te tahi ra, te nā ò mai ra ia e : Aita to ù e manaò.

Ei pāhonoraa maramarama

Ua ite tātou i te rahuraa te Atua i tele nei ao e, no roto mai te maramarama i te pōuri. No reira, mea faufaa aē no tātou te pāhonoraa a te taata manaò òre, i te pāhonoraa a te taata manaò. Ia au i te mau mea atoā ta teie taata i hiō mai, ta na i ora mai, ta na i tāmata mai, aita hoē mea e tauturu ra ia na i te maramaramaraa i te uiraa i tuuhia atu i mua ia na. Te auraa, i roto i te āau o teie taata, aita hoē mea e tauturu ra ia na i te horoāraa i ta na pāhonoraa.

Te taata tei mātau i te miti, ia topa o ia i roto i te miti, ua ite o ia i te òhipa e rave, āreā te taata tei òre i te miti, e riro ia taata i te fifi. Te ite ra tātou i mua i teie hiōraa e, e tuhaa rahi ta te fenua i roto i te huru ite ta te taata e haaputu i roto ia na a riro atu ai ei pāhonoraa na na i mua i te mau uiraa atoā ta te oraraa e tītau mai ia na ia pāhono. A tae ai hoi i te reo, tei reira te heheuraahia ta te taata huru faanahoraa i to na oraraa i niā i te fenua ta na e pārahi ra.

Ia parau tātou e, fenua, aita tātou e hiō noa ra i te tahi vāhi tei òre i tāpoi-hia e te pape e tei riro ei tupuraa no te āihere. Te fenua, te vāhi ia i te mai, te vāhi i reira o ia i te haapiiraa e te titaauraa i te mau mea atoā e maitai ai o ia, e òaōa ai, e e tupu ai hoi i te rahi.

Te opuaraa a te Atua

I mua i ta tātou tumu parau, ua ui tātou e : mea taa ē ānei te manaò o te Māōhi i to te Papaā, aore ra i to te tahi atu mau nūnaa, te faaturori ra tātou i te manaò o te taata.

Te uiraa rā e tano ia uhia, teie ia : Ua maramarama mau ānei tātou i te opuaraa a te Atua e faaitehia ra i roto i te parau no te taata hāmāniraahia i te repp fenua ; ia fārii tātou i te reira ra, ua ite atoā ia tātou e, i mua i te mau fifi o te oraraa, e taa ē te pāhonoraa a te tahi pupu taata i ta te tahi, no te mea eete hoē ā huru ite ta te fenua, te reo, e te oraraa i nanaò i roto i te āau o te reira e te reira pupu taata.

Ua ite tātou i te feiā hopu, pāpū noa ai rātou i ta rātou

òhipa, eere hoē ā hohonuraa ta rātou e pou. Ia òre te tahi ia faaineine-maitai-hia, e iti te vāhi e naeāhia ia na. Oia atoā te manaò o te taata i roto i te pupu tātai tahi, e rahi to te tahi, e e iti to te tahi, ia au atoā i te huru faaineineraa ta te oraraa i rave i niā i te reira e te reira taata.

Ia parau anaē o Pauro e, io te āti luta, ua faahua āti luta atoā o ia (I Torinetia 9, 20-23), ua nā reira hoi i roto i te reira pupu taata e te reira pupu taata, te riro ra te reira mai te tahi faaineineraa ia tātou i te fāriiraa i te tahi e te tahi i roto i to na taa-ē-raa. Mai te peu e tamarii mau tātou na te fenua, te fenua mā to na reo, ta na peu, ta na faanahoraa..., e tamarii atoā ia tātou na te Atua. E no te mea hoē anaē reo ta te fenua i ite, oia te reo o te Atua, te reo aroha e te here, taa ē noa atu ai te huru parauraa, ua ite atoā tātou e, ia au i te huru haapiiraa ta te fenua i horoā i te taata, e taa ē atoā ta na huru pāhonoraa i ta te tahi.

Eiaha e haamoe i te reo

Ei haapotora e ei ōpaniraa, e nā ò noa ia tātou e, e manaò to te taata atoā, te Māōhi, te Papaā, e te vai atu ra, eere rā hoē ā mea ta te fenua, te reo, te oraraa i nanaò i roto i te āau o te taata. No tātou atoā, te riro nei te reo ei titeāmata e nā reira tātou i te hiō i te oraraa. Te taata tei hinaaro i te parau i to na manaò, oia te mea i nanaōhia i roto i to na āau, e nā roto ihoā o ia i te reo i te faaite mai i te reira. Ia ara atoā rā tātou, eere te reo i te tahi noa āuvaha, e faaite rā te reo i te faanahoraa ta te fenua i nanaò i roto i te āau o te hoē nūnaa. To tātou fifi rahi i teie mahana, te mea ia e, te rahi noa atu ra te Māōhi e parau fārii noa nei nā roto i te reo māōhi, te rahi no atoā atu ra ia te taata e pārahi noa nei i roto i te reru e te fārii òre ei teōteōraa no rātou te riroraa ei tamarii ta te tahi fenua i fānau, i ātuātu, i poihere, e i haapii, no reira atoā te parau o te Māōhi i te fifi i te fāriihia e te Māōhi iho, no te mea te rahi noa atu ra te feiā i faraoa-ota-roa-hia te āau.

Ua ite tātou i te taata ia pāpai i te tahi parau, a pāpai faahou mai ai i te tahi parau taa ē atu nā niā iho, eere te mea òhie ia taiō. Ahiri i faaāteahia te tahi pāpairaa i te tahi, eita te reira huru fifi e fāreirehia. Mai te peu e, ua òā-hānoa-hia to tātou āau, nā hea ia tātou e ite ai i te mea i nanaōhia i niā iho. Ua ite tātou e, aita e taata i faaērehia i te manaò, no te mea e taoā horoā te reira na te Atua. No te rau hoi o te tiare i ūnaūna ai te hoē āua ; no te rau atoā o te manaò e ūnaūna ai te taata.

Turo a Raapoto

Dessin Eric Ferret

